

四庫全書

集部

欽定四庫全書

華陽集卷十二

宋 張綱 撰

表

紹興二十九年加恩謝表

臣某言今月二十八日伏准告命以郊祀大禮赦恩加
臣食邑三百戶食實封一百戶臣已即時望闕謝恩祇受
訖禮備郊丘既錫萬方之慶身居畎畝亦均列辟之恩
國雖有常臣實增愧臣某誠惶誠懼頓首頓首伏念臣

叨逢興運嘗忝近班負至愚不學之才辱上聖非常之
眷亡骸盛世方竊幸於餘生真壁中壇曾莫陪於熙事
敢期朽質尚冒殊榮不惟增行於本封且復併加於真
賦明綸俯被感涕交流此蓋伏遇皇帝陛下道與時行
人無遐棄推廣輝庖之畀特優簪履之餘犬馬已疲知
難酬於異顧雲天在望徒銜結於危衷臣無任

顯仁皇后上僊慰表

臣某言臣伏覩今月二十一日皇太后遺誥奄棄大養

號動震驚殞越失措臣某誠悲誠感頓首頓首伏以皇
太后誕生神聖進配姜任方享遐齡遽返僊路恭惟皇
帝陛下孝愛本自於天性哀衷必過於人情仰乞上念
宗祊俯從禮制少抑晨昏之慕用安夷夏之心臣退伏田
野不獲奔赴闕廷臣無任

欽宗皇帝升遐慰表

臣某言臣伏聞孝慈淵聖皇帝厭世升遐中外臣民號
痛如一臣某誠悲誠感頓首頓首竊以孝慈淵聖皇帝

體道淵淨逢時艱虞北狩未還僊期奄迫恭惟皇帝陛下友愛方懷於遐裔哀恫忽感於訃音天數莫逃聖情難處仰乞深思付託少抑哀摧上安宗社之靈下副黔黎之望臣衰遲得謝退伏田野不獲奔赴闕廷臣無任

紹興三十一年明堂禮成賀表

臣某言恭聞今月二日明堂禮成賀赦天下者肅九筵而享帝於昭陟配之儀斂五福以錫民茂舉滌瑕之典龐鴻所被舞蹈惟均臣某誠歡誠忭頓首頓首竊以禮

莫重於承天孝必先於嚴父考國家之大祭侑祖考而
迭尊考經之中惟聖時克恭惟皇帝陛下至仁御宇盛
德寧神推生民之功雖郊禋之屢展繼下武之命顧宗
祀而敢稽乃發渙音載揚熙事我將我享而時物兩盡
不怠不煩而情文孔昭萬壽無疆既順成于天慶五刑
有赦爰誕布于國章道洽幽明光垂簡冊臣自初遭遇
投老衰殘心存王者之堂儼豆籩而可想身被野人之
服望鵷鷺以難追徒竭孤忠少陳善頌臣無任

紹興三十二年加恩謝表

臣某言臣今月二十六日伏准告命以明堂大禮赦恩加臣食邑三百戶臣已即時望闕謝恩祇受訖饗帝合宮盛儀既舉均釐列位朽質奚勝臣某誠惶誠懼頓首頓首伏念臣遇主一生致身二府捐軀報國雖素志之未渝急景周年曾寸勞之莫效上聖嚴裡而昭孝庶工祇載以盡誠初無奔走之勤敢意寵鴻之逮茲蓋伏遇皇帝陛下法天懋德稽古馭臣謂夫祭大則澤宜豐不以

人微而禮遂廢肆推茂渥俯及衰蹤臣拜命凌兢捫心
感懼明綸輝耀但知傳示于子孫病骨尪殘難復仰酬
於覆幬臣無任

紹興三十二年冊立皇太子賀牋

伏聞皇太子殿下升儲位定受冊禮成不間邇遐同深
慶幸云云竊以問安視膳孝篤于在三監國撫軍義
符於明兩克光盛典允屬元良伏惟殿下英粹凝姿溫
文懋德久繫人神之望是膺七鬯之司罄萬邦而宅心

知九鼎之增重臣退身耄及荷國恩深徒跂仰于星輝
阻進瞻于玉極丹衷竊忤倍百常倫

禪位禮成賀太上皇帝表

臣某言臣伏覩詔書恭聞太上皇帝陛下今月十一日
禪位禮成者肅詔春宮光傳寶位盛德之事曠古罕儔
臣某誠歡誠忤頓首頓首恭惟太上皇帝道合祖宗量
包天地炎圖再造備經三紀之憂勤黃屋何心思享萬
年之壽考運神謨而獨斷舉曠典而必行禮方盛於建

儲命亟聞於與子堯以位傳之舜退享無為之為周之
歷久於商永尊衆父之父臣生平冒寵老病辜恩聆大
號之聿頌撫孤忠而自感朝太公於五日阻陪仗衛之
趨祝唐帝於千秋但切精誠之懇臣無任

皇帝登寶位賀表

臣某言臣伏覩赦書恭聞皇帝陛下登寶位大赦天下
者位正乾元宗祧永賴恩流渙號夷夏交欣臣某誠歡
誠忭頓首頓首恭惟皇帝陛下濬哲在躬淵冲稽古允

若謳歌之咸戴居然歷數之有歸爰遇飛龍遂安神器
以聖繼聖遠追堯舜之蹤雖休勿休佇洽養農之化臣
頃叨華近今困衰遲法座凝旒望龍顏而可想明庭輯
瑞造鵷序以無階臣無任

車駕巡幸起居表

邊檄交馳皇輿順動赫先聲於有截空大敵以無前臣
某誠歡誠忭頓首頓首恭惟皇帝陛下纂紹丕圖憂勤
庶政憤強鄰之我侮戒虎旅以徂征詔舉時巡方肅鳴

鷹之仗士爭賈勇咸均挾纊之恩恢復之期可坐而策
即日餘寒在候六飛御途神動天隨聖躬萬福臣身居
畎畝分隔雲霄仰跂清塵雖違顏於咫尺恪遵嚴令阻
扞牧以奔趨臣無任

隆興元年冊立皇后賀太上皇帝表

臣某言臣伏覩制書恭聞今上皇帝冊立皇后者聖神
傳序道必本於正家柔順居中禮益尊於大養時乃鉅
典浹于歡心臣某誠歡誠忭頓首頓首臣聞首風化者

治內于閨門明人倫者造端乎夫婦既格移風之效復
詒燕翼之謀徽教孔昭熙朝創見恭惟光堯壽聖太上
皇帝陛下儲神淡漠軫慮淵深念嗣聖之紹休屬長秋
之虛位聿求邦媛載肅坤儀五日以朝太公肇新中饋
之助二南之得淑女更懋始基之圖臣夙荷殊恩欣傳
渙號從鳴鸞而問膳想聞環珮之聲瞻黼座以稱觴阻
預簪纓之列臣無任

又賀太上皇后牋

臣某言臣伏覩制書恭聞今上皇帝冊立皇后椒房
正位聿新教化之原寶冊流光肇式邦家之慶禮成禁
掖觀動華戎臣某誠歡誠忭頓首頓首臣聞乾坤合德
而茂育羣生日月並明而照臨四海自昔有為之主必
資內助之賢選建柔良屬當熙洽恭惟皇帝陛下齊家
憲古篤孝奉親惟中壺之久虛慮陰教之或缺稟訓言
於壽聖淑先窈窕之求發渙號於昕朝咸覲禕禴之盛
一人受福百世垂休臣荷恩至深投老無用不圖晚景

獲覩上儀萬壽稱觴顧莫陪於旅進二南紀德徒竊誦
於流芳臣無任

又賀皇后踐

臣某言臣伏覩制書恭聞皇后正位宮闈者坤儀告成
陰教有主是興正始之道以立太平之基臣某誠歡誠
忭頓首頓首臣聞御于家邦必本人倫之叙首以風教
實由內治之脩禮既行于會通時自臻於福祿恭惟皇
后殿下塗莘積慶任姒推賢占符立馬之祥譽見濯龍

之兆瞻王后之五輅已均厚載之功仰天極之四星更
廣照臨之惠臣無任

乾道元年郊祀禮成賀表

臣某言臣恭聞正月一日郊祀禮成者主神器以宅師
夙懋靈承之敬陟泰壇而類帝肇迎滋至之休幽顯變
和華戎慶賴臣某誠歡誠忭頓首頓首竊以祀者國之
甚重禮非時而不行因天事天尊祖聿嚴於大報基命
定命承祧尤謹於初郊恭惟皇帝陛下躬舜繼堯系唐

接漢久協謳歌之戴靡忘燔燎之恭稟壽聖之成謨舉
園立之大典慮軍興而改卜心益務於專精用人正之
初元事益光於故實昊穹昭答靈瑞薦臻躋富壽於斯
民永延洪於丕祚臣身居畎畝望絕霄雲籲俊充廷難
綴奉璋之列可封成俗但賡擊壤之謠臣無任

辭免召赴行在恩命謝表

臣某言臣近具奏辭免召赴行在恩命今月二十八日
准尚書省劄子奉聖旨張某一時老成朕所渴見已令

趣召乃以耄老為辭重違雅志可從所請令所在州軍
常加存問仍賜羊酒者叨恩趣召輒陳衰病之情從欲
推仁更冒撫存之寵危衷激切感涕交橫臣某誠惶誠
懼頓首頓首伏念臣素乏時才久愆膺力報國罔施於
尺寸捫心空負於生平忽聞收召之音衆謂死灰之復
焰自揣支離之骨獨嗟老馬之先疲與其上誤於使令
孰若退安於分守是殫悃幅仰覲哀憐載惟聖主龍飛
尚阻造庭之敬况復邊隅雲擾尤非避事之時竊料微

蹤必嬰嚴譴孰意乾坤之造曲昭螻蟻之誠垂溫旨以
丁寧既遂桑榆之志敕有司而存問更加牢醢之頒得
過所期愧何以稱茲蓋伏遇皇帝陛下接下以禮推恕
及人知臣樸拙而非敢矯誣察臣病瘁而莫能強勉靡
愛優隆之澤用增枯朽之華臣荷眷益深謝恩無路風
雲遇合雖絕望於攀鱗畎畝優游但懷忠於結草臣無
任

乾道元年加恩謝表

臣某言臣今月十一日復准告命以隆興二年十一月二十九日冬至詔書進封臣開國公加食邑三百戶臣已即時望闕謝恩祇受訖至仁恤祀特先事以疏恩朽質辭榮復隨班而冒寵光生爵邑愧溢心顏臣某誠惶誠懼頓首頓首伏念臣身起布韋家無儋石偶玷高華之列已深溫飽之慙敢冀暮年復叨異數植圭貴重遂首冠於諸侯采地豐饒更增加於多戶退念乞骸之久初無雜草之勞得之若驚悸不自定茲蓋伏遇皇帝陛

下丕承大業肇舉明禋卜郊爰徙于權宜霈澤靡嫌於
過厚甫及初陽之日亟頒大賚之音罔間孤微俾階進
序臣桑榆景迫犬馬力疲寶軸熒煌但覺光輝于梓里
丹心感切無緣舞蹈于堯階臣無任

乾道元年冊立皇太子太上皇帝賀表

臣某言臣伏覩制書恭聞今上皇帝冊立皇太子者大
庭發冊肇基國本之安萬乘稱觴式表傳家之慶縟儀
創見至養彌隆臣某誠歡誠忭頓首頓首竊以稟睿筭

於慈闈正重明於上嗣是謂兩宮之兼美誠非百代之
可儔恭惟光堯壽聖太上皇帝陛下德冠二儀量包天
地探至道於燧人伏羲之上閱成功於夏康周宣之時
愛方樂於含飴禮遂觀於主鬯子又孫而孫又子益知
問寢之恭天占人而人占天咸驗卜年之永臣叨恩惟
舊卧疾增深霈澤多方但切遭逢之幸班朝五日阻陪
蹈舞之趨臣無任

又賀皇帝表

臣某言臣伏覩制書恭聞冊立皇太子者儲宮正位昭
大慶於宗祧顯冊告庭浹多歡於夷夏臣某誠歡誠忭
頓首頓首竊以周室教行於三善漢家頌美於重光蓋
考震離之文取侷星海之象恭惟皇帝陛下以天地為
重以祖宗為心躬大養而不違于睿謨舉盛禮而獨高
於往牒天下之本既立聖人之功孰加臣退處窮山欽聞
曠典鷄鳴鶴禁遙知問寢之恭鸞集螭墀阻預稱觴之
列臣無任

遺表

臣某言臣伏為疾患危篤上遺表者抱病衡門已絕再
生之望馳心魏闕輒伸將死之言臣某誠惶誠懼頓首
頓首伏念臣脫迹蓬蒿參華簪紱伶俜一介遭遇四朝
繇經濟之才踈故功名之念薄頃投閒散屢閱星霜上
皇擢貳政機冒寵僅周於歲律陛下再頒名節卧病莫
造於天墀宸心終始以矜憐異數便蕃而存問乾坤大
造獨厚孤微蒲柳殘生知難稱塞方幸優游於樂土庶

幾休養於餘齡而臣福過災生鐘鳴漏盡負薪之憂寢劇屬續之息僅存雖人生如過隙之駒光陰易捨然情迫若戀軒之馬思德難忘伏望皇帝陛下體道御時配天立極施仁發政躬周后之憂勤修己安人法唐堯之慈儉懷柔夷狄褒禮忠良上遵一定之規模益固無窮之基緒臣形將就木志切傾葵想清禁以魂迷撫殘骸而涕墮上茂陵之書而獻佞肯效前人結輔氏之草以酬恩尚期異日臣無任

二二二二二

華陽集

十三

華陽集卷十二

欽定四庫全書

華陽集卷十三

宋 張綱 撰

疏

徽宗天寧節功德疏

乘天德而出寧誕記流虹之瑞佇時巡之歸格遙瞻就
日之心虔叩覺慈仰祈睿筭庶竭消塵之助少酬覆幬
之私道君太上皇帝伏願六氣御和三靈垂佑迎太公
而還漢載嚴五日之朝慶靈武之興唐永奉千秋之節

欽宗乾龍節功德疏一

大德必得其壽固自享於延洪忠臣遠不忘君更欲申
於報効屬紀誕彌之節虔依無碍之慈同厥有生咸傾
善頌恭惟淵聖皇帝陛下宅心齊聖體道淵冲恭勤出
天性之自然孝友造人倫之極致南薰應候徒知揖舜
之風朔野時巡猶隔就堯之日伏願密回天鑒坐擁神
休兩國交歡佇六飛之旋轡萬年祝聖偕百辟以稱觴

上聖篤生肇千秋而紀節羣心胥慶敢一日而忘君注
想玉容投誠金地庶憑願力上贊皇齡孝慈淵聖皇帝
陛下伏願臨乎道德之精剛玩神明於昭曠自天降福與
時偕行返瑤池八駿之遊對周邦而咸喜享嵩嶽三呼
之祝隆漢祚於無窮

三

純乾紀月載震開祥北望堯天未報生成之德仰瞻佛
日用伸祈嚮之私孝慈淵聖皇帝陛下伏願體道淵冲

玩神昭曠問途牧馬回法駕于襄城占瑞老人對靈光
於南極

四

葵藿餘生猶知向日簪紳舊物敢忘愛君載臨震夙之
辰寅奉熏修之禮冀憑法力默佑清躬孝慈淵聖皇帝
陛下伏願德隨日新誠動天監六飛在御早回朔野之
巡萬壽無疆克配南山之詠

五

配天盛德欲報難名彌月紀辰敢忘善頌庶竭消埃之
助少伸犬馬之私孝慈淵聖皇帝陛下伏願上帝眷臨
百神儼衛駕雲龍之駟按平路以南旋占箕翼之星固
皇齡而北拱

六

羲日南交初屆長贏之候堯雲北望載臨震夙之辰罄
寰宇以均歡竭忱辭而請祝孝慈淵聖皇帝陛下伏願
神祇祖考昇景福以彌昌山阜岡陵茂皇齡而益固

乾龍節滿散道場文

虹渚開祥屬此正陽之月雲天在望曷勝就日之心用
虔祝於皇齡輒仰憑於慧力淵聖皇帝陛下伏願三靈
垂祐六氣御和至孝自格於神明盛德永膺于福祿順
斗杓之南指亟旋八駿之遊過嵩嶽而聞呼永享萬年
之壽

高宗天申節功德疏一

天其申命用休誕紀生商之節臣能歸美報上同傾戴

舜之心仰叩覺慈虔申善祝皇帝陛下伏願仁恩天覆
威令風行復廟社于中原茂本支于皇祚坐明堂而朝
萬國閱八千歲之春秋疆戎索以禦四夷作億兆民之
父母

二

盛德在火流光繞樞開長發之祥普天同慶效華封之
祝擊壤成謠皇帝陛下伏願宗社安安蠻夷率服國史
播豐年之詠司空廣輿地之圖治定功成案六經而較

德天長地久參萬歲以成純

三

赤伏標符爰啟中興之運瑤光貫月肇開長發之祥屬
令節之載臨罄綿區而申祝顧叨法從敢怠愚誠皇帝
陛下伏願聖德上昭皇威遠暢成大功以安四海效厚
福以錫黎民載新興地之圖恢中原於有截誕受泰元
之英纂丕祚於無疆

四

惟皇作極被四表以尊臨申命自天垂萬年而永固爰
屆誕彌之節載傾請祝之誠庶竭涓埃上禋海岳皇帝
陛下伏願參天地而化育並日月以照臨威強成於道
德而九服來王孝弟通于神明而兩宮返國築靈臺而
偃甲用彰無敵之仁開壽域以躋民同享太平之福

五

彌月屆期協火德自然之應後天祝嘏叩金僊無碍之
慈顧微塵何補於丘山維向日自傾于葵藿恭惟皇帝

陛下聰明達禮孝弟通神繼好息民泱歡聲于遐邇考
經作制新隆典於明昌載臨出震之辰宜獲自天之祐
伏願四時不忒萬國咸寧稽三百五篇之詩既醉已歌
於至治採七十二君之制升中遂告於成功

六

皇天眷命上帝篤生肇八荒再造之基祥開華旦垂萬
世無疆之福歡浹羣倫用傾向佛之心仰罄祝堯之請
皇帝陛下伏願握符御極旋乾轉坤四時平而風雨時

五穀熟而民人育新又新而不怠德銘益懋於湯盤朔
更朔以無窮神美彌增於漢歷

七

火德當陽方啟明昌之運樞星照野載臨震夙之期爰
即寶坊聿嚴法會皇帝陛下伏願體道淵靜儲神穆清
如岡如陵長上古而不老卜年卜世嗣大歷以無疆

八

熒賓在候昭盛德於炎精長發其祥下靈光於華渚於

赫生商之旦有開復禹之基屬令節之載臨竭綿區而
申祝皇帝陛下伏願三靈助順六合同風政陶陶而日
新福簡簡而滋至三萬里農桑之本版圖益廣於邊封
八千歲春秋之期寶歷彌增於睿算

九

表正萬邦惟君為大靈承上帝何福不除矧當彌月之
期更切後天之祝皇帝陛下伏願誕膺百順丕式九圍
老人呈南極之祥神筭授泰元之秘治無為而自化熏

陶益廣於堯仁聞盛德而偕來玉帛常趨於禹會

十

道莫大於帝王方隆景運功已參於天地何假頌言惟
載夙之昌期實綿區之共慶欲効消塵之報不勝葵藿
之傾爰即淨方聿嚴法會皇帝陛下體道淵靜儲思穆
清時和歲豐而協氣橫流禮制樂作而頌聲洋溢文謨
武烈冒率土以歸仁舜日堯天垂後天而難老

十一

瑤圖在御萬方瞻北極之尊虹渚呈祥百辟獻南山之
壽茲仰憑於佛力冀申祝於堯仁皇帝陛下伏願六氣
御和百神受職考七十二君之展事聿陳梁甫之儀閱
千二百歲以修身盡得廣成之道

十二

千齡撫運為天下君萬國傾心祝聖人壽况忝服乘之
舊載逢震夙之期爰即寶坊用嚴法會皇帝陛下伏願
乾行剛健離照光明體道御時道甚大而王亦大立政

勸化政日新而德又新生成不宰之功永嗣無疆之厯

十三

天佑寶圖時生真主百靈儲祉咸趨震夙之期四海均
歡敢後延洪之祝皇帝陛下伏願懋昭大德邁駿有聲
並日月以正明運陶鈞而獨化天開地闢揮八極以凝
神治定功成握萬年之景命

十四

星火當天五百歲篤生於上聖香花供佛三千臣同竭

於一心庶憑覺海之慈仰贊壽山之固皇帝陛下伏願
體乾之健如日之升建皇極以錫庶民生明堂而朝萬
國魚鳶遂性樂舜德于薰絃箕翼占祥永漢圖於寶筮

十五

雷厲風飛方大中天之業虹流電繞載臨彌月之期望
玉階以歡呼叩金僊而請祝皇帝陛下伏願決柔用夬
行健乘乾赫厥聲而濯厥靈顯諸仁而藏諸用持有道
之勝皇都坐復於輿圖受無疆之休睿筭永齊於箕翼

十六

成功不居坐享無為之樂大德必壽欣逢載夙之辰眷
踈遠之微蹤負私恩而莫報唯憑善頌少效愚衷光堯
壽聖太上皇帝陛下伏願體道希夷儲神淵靜擴孫
謀而貽燕開寶運之亨嘉萬乘稱觴永尊天子之父千
齡御辨同符泰帝之庚

十七

星樞紀瑞方申過歷之期鸞輅乘儀肅奉稱觴之禮事

獨高於曠古歡允浹於羣黎曾是叨恩敢忘善頌光
堯壽聖太上皇帝陛下伏願游神昭曠問道崆峒體太
極以函三法乾元而用九坐觀聖子述成萬世之功永
鎮皇圖安享千秋之養

十八

赤符應瑞既成復古之勳黃屋非心爰享後天之筭式
逢誕節更瀝懇祈光堯壽聖太上皇帝陛下伏願氣襲
堪輿心游淡漠迪亨嘉于豐豫齊久大于乾坤舉漢帝

之玉卮益隆至養受唐臣之金鑑永鎮丕圖

天申節開啟道場文

炎帝執衡司夏誕彌膺火運之昌文王受命作周光祚
協帝齡之永顧盛德何施於善頌惟羣心欲效于愚誠
恭啟法筵仰祈慧照皇帝陛下伏願惟皇建極申命自
天靖疆場以無虞洗甲兵而不用開八荒於壽域均調
天地四時之和朝五玉於明堂永作神民萬物之主

天申節滿散道場文

流電繞樞兆一人之有慶斷鰲立極均萬寓以蒙休載
臨彌月之辰祇率周行之士咸趨法席用竭愚誠皇帝
陛下伏願彞倫叙乎九疇治道貫乎三極風雨時而五
穀熟干戈戢而四海平如日之升益懋昭於盛德後天
而老期永御于洪圖

會慶節功德疏一

膺正統以當天光啟繼明之運紀誕彌於良月丕昭受
命之祥仰叩洪仁虔申善頌皇帝陛下伏願新美庶政

緝熙大猷三靈允格於繁禧四海皆臣於盛德盡事親之道萬年均壽聖之歡簡上帝之心百世邁岐周之歷

二

甲觀開祥仰千齡之盛旦祇園獻祝竭四表之歡心矧夙荷於殊恩顧敢忘於善頌皇帝陛下伏願百靈薦祉六合承風單于趨渭上之朝博士刺經中之制天長地久參萬歲以成純子孝父慈會一人之有慶

三

為天下君上帝啟誕彌之慶祝聖人壽黎元均愛戴之心蓋有生蒙雨露之恩念無路效涓埃之報肆殫願力仰叩佛慈皇帝陛下伏願體道柔乾配天立極漢庭多暇躬太公五日之朝周歷無疆介君子萬年之福

四

受命當陽咸仰誕彌之慶傾心向佛虔伸頌禱之勤冀仗慈光聿崇睿筭皇帝陛下伏願德參上古業廣中天橐弓矢而戢干戈考制度而正禮樂燕周王之孫子益

茂本支奠漢室之山河永觀帶礪

皇太后生辰功德疏

道盛母儀夙肇生商之慶祥開宮壺載臨夢月之期爰
啓琅函仰祈鴻筭皇太后殿下伏願百神薦祉六氣御
和歌聖德於思齊本支益茂奉慈顏於長樂壽考無疆

皇后生辰功德疏

紫房正位夙著于柔儀黃氣占祥載臨于誕日虔申頌
禱仰贊延洪皇后殿下伏願道集坤元福流震索承顏

長樂同臻萬壽之期協德闕睢永輔一人之慶

徽宗皇帝追薦道場疏

弓劍上賓痛龍胡之莫附香花修供舍檀海以疇依法
會有嚴威神如在起登彼岸願同梵釋之遊陟配在天
永錫邦家之福

寧德皇后追薦道場疏

坤儀永闕曷勝長樂之悲佛法無邊用啟華嚴之供人
天來會鐘唄宣揚仰祈如在之神遂證無生之果

○ ○ ○ ○ ○ ○ ○ ○ ○



卒陽年

十

--	--	--	--	--	--	--	--

華陽集卷十三

欽定四庫全書

華陽集卷十四

宋 張綱 撰

劄子

論獄囚瘐死劄子

臣聞詰姦禁暴莫重於獄敗法亂政莫甚於治獄之吏
恭惟陛下自即位以來每發德音下明詔未嘗不以欽
恤刑獄為先然近歲吏奸成市未能遽革或緣貨鬻或挾
怨讐言或望風旨或私逞威勢捶楚之下欲致之死地往

往先以病聞及其已死縣匿之不以申州州匿之不以申監司上下相蒙難以稽察按紹興斷獄勅諸囚在禁病死歲終通計所禁人數死及一分則官吏以次斷罪罪止杖一百此固法之善也然繫囚日死官吏斷罪之文初未嘗舉行夫欲懲其苛慘而罪止於杖責之既輕復為虛文宜其吏之不知畏也昔漢宣帝詔郡國歲奏繫囚以掠笞若瘐死即坐名縣爵里丞相御史課殿最以聞臣愚欲自今以後令州縣月具繫囚存亡之數長

吏結罪保明申提刑司歲終舉行斷罪之法仍每路比較一州一縣死囚最多之數具當職官吏姓名取旨黜責其最少處亦乞量行褒賞如宣帝故事庶慤酷稍懲人無橫害以廣陛下好生之德取進止

乞久任劄子

臣聞張官置吏本以為民與民親者莫如監司郡守前代以來尤重其選然未有不使之久任而責其成功者也國家稽古建官舊以三年為任近歲員多闕少率二

歲為成資以古驗今已不為久使人人得成資而代猶足以稽其功效竊見比年監司郡守往往數易或到任未滿一年或纔三兩月輒代去夫郡守治一州監司總一路其風俗之厚薄吏胥之欺詐簿書訟獄之繁夥非一朝一夕所能省察也借使材術過人亦必遲之歲月然後可以措手今乃不待席煖數見換易前官視事日淺未究設施而後官已至端緒復亂人懷苟且迄無成功又况遠近送迎士卒疲苦往來饋給州縣煩費當此

艱虞之時豈無所損哉臣愚欲乞檢會二年成資命指揮
申嚴行下今後監司郡守除以罪去不問久近其他並
令成資如朝廷選材名擢亦以到任一年方許受代所
貴吏得安職民受實惠取進止

乞令帥守條列利害劄子

臣竊觀陛下即位以來勵精圖治崇諫諍之風而虛心
於敢言之士懋緝熙之學而留聽於勸講之臣猶以為
未也乃自從官下至百執事皆令以次轉對可謂得聽

納之道矣然而州郡帥守於民尤親講求時務亦應有所論奏雖詔書數下中外奉承其間尸官循默之人曠日持久曾未聞以讜言至論上徹聖聽甚無謂也臣伏見仁宗皇帝詔沿邊郡守替日各具民間及邊事五件奏聞蓋欲躬垂明聽以察四方萬里之遠然則凡在官者孰敢不究心所職哉臣愚欲望陛下舉行仁宗故事應諸路帥守不日到任久近至替日各令條列本處利害五事以上畫一具奏其沿邊州軍仍論邊防急務悉

可行於今者庶幾人皆竭誠盡慮仰副陛下求言之意
取進止

上嚴邊備劄子

臣竊觀國家自遭金人之難繼以奸臣僭竊中原陷沒
社稷阽危此天下之所痛心疾首恨未有以報也比來
川陝之師捷書屢至隣境內擾敵氣沮衄是乃上天悔
禍之時中外人心亦少快矣然臣竊有所慮者蓋羣情
樂於苟安事變生於所忽天不假易道貴圖艱今雖警

報稍寧然所以自為備者豈可一日廢也又況兗渠假
息陰連外國深謀詭計緩急相應則羸師張我或未可
知傳曰上兵伐謀又曰先為不可勝以待敵之可勝正
今日之先務臣愚欲望陛下明詔有司日慎一日常若
寇至應沿邊去處無得徹警要令斥堠益遠關防益密
訓士卒察奸細以至城池樓櫓器械之屬亦宜常切按
視以時修葺如此不唯物各素具可以應卒抑使士氣
不惰國勢自強恢復之基於是乎在取進止

乞詔大臣兼領史事劄子

臣聞自古帝王之興必有信史備載一時行事所以昭示天下後世不可缺也恭惟陛下繼紹丕圖于今七年勤勞萬幾夙夜不怠將以恢中興之業比迹周宣漢光而東觀日歷未有述焉頃因臣寮上言嘗詔論撰然自艱難以來簡編散逸時政起居本末不備方且重行搜訪內則闕聞於百司外則取會於州郡既以節目繁夥供報為難又緣秘書權輕諸路視為不急雖復文移往

返未有汗青之期深恐歲月侵久事或失實愈難考正
竊見今之著作局乃昔之史館祖宗時嘗以宰臣兼之
故史權增重臣愚欲望陛下聖慈若稽故實特詔大臣
兼領史事而委以筆削之功庶幾聖明盛典粲然備舉
天下幸甚取進止

論買牛筋角劄子

臣竊謂方今國家之急有二一曰治兵二曰務農治兵
所以強國務農所以足食二者相須以濟殆難以偏廢

也夫兵無弓矢固不可以戰然農無牛亦安能服田力
穡此正宜今日之所圖者臣伏見近日軍器所打造弓
壹萬張計用牛筋六千七百四十五斤角一萬一千隻
續奉聖旨分一半下浙東收買此迺陛下留神武備修
治器械以防強鄰深得夫宣王復古之意矣有司奉行
詔書獨患筋角數多無人出賣州郡決不能以時應辦
蓋一牛得筋不過數兩約用三牛可得筋一斤今所買
六千餘斤無慮二萬牛矣緣自兵火以來遠近耕牛驅

擄屠殺殆盡至有以人代耕田畝荒蕪莫之墾闢頃者
朝廷察知故嚴立罪賞禁人屠宰自是人稍知戒然所
在畜養未久正須遵行法禁以俟蕃息今乃分科筋角
下州縣收買州縣必需科下人戶人戶之牛自死者其
筋角既已依條納官緣何更有出賣深恐官司務欲辦
事妄行促迫則小民畏懼勢須殺以應命顧罪賞如此
誰敢輒殺設或奸猾之民以所須筋角為名遂復恣為
屠割不知州縣何以處之欲加以罪筋角無所從出欲

縱之法令不行而殺牛滋多益廢耕耨是於國家務農之意有未至也臣訪聞溫台衢婺等州昨為隣境盜賊竊發其間豪民多緣扞禦收蓄良弓今筋角旨意既行所買必不能足數臣愚欲望聖慈下三省相度除一面收買筋角外浙東人戶能以堪用好弓力及八斗以上者赴官投賣即令州縣每張約筋角若干而給還其直總計所買弓補充今來所降筋角之數如此不唯收買易辦且得存養耕牛農人不至失業兼使民間兵器以

漸納官是以一舉而獲三利也區區管見干犯天威無任惶悚戰懼之至取進止

論土豪獄久不決劄子

臣聞臯陶告舜曰與其殺不辜寧失不經好生之德洽于民心夫以德洽民心其本在於慎罰此虞舜之治天下所以歸仁仰惟陛下纂業中興憂勤不怠監觀庶獄尤務哀矜既已臨遣使輶宣諭德意而又親灑宸翰刻石以詔有司唯恐淫刑以逞濫及無罪是宜四方風動

下無寬民然臣竊觀軍興以來每遇寇亂村人往往乘
時倚勢羣輩剽劫以至殺人放火時或有州縣尋訪根
治罪大而左驗明白者固已即時就戮其情由曖昧黨
與牽連則必逮繫証案奸吏受賕滋蔓及于平人是致
獄久不決而斃于累囚者不可勝數小人見其如此或
挾讐言怨或規賄利轉相告訴無有已時故雖歲月深遠
事既滅息而官司因其告訴輒復收捕驗治是以獄訟
愈多而人情不能安處方其事變擾攘無知之民違法

作過何所不有罪在一時豈無誑誤自建炎已酉至今
經涉五年推窮誅治亦足以鉏奸去惡使民知畏矣然
而囹圄置對猶或有未決之囚官吏受辭無以絕方來
之訟近者紹興府亦嘗申請止言金人占據去處而不
及他盜紛擾之地止言土豪專輒斬殺之罪而不及細
民乘時殺傷等事雖已特降指揮又不徧及天下似于
聖威推行未廣臣愚欲望陛下載頒詔旨截自紹興元
年正月一日以前應因寇亂聚集作過及殺傷等事一

切不問州縣勿復受理如事已在官而未結正者並令
釋放所貴曠蕩之澤普浹天下雖堯舜好生無以過此
取進止

論淮南官冗劄子

臣伏見淮南州縣數經殘破比年餘閒稍稍歸業正在
朝廷加意拊循庶幾德澤下究創痍漸復然其間官吏
設員太冗裁減未盡侵漁騷擾為害不細甚非勞來還
定安集之意方今國家大勢以東南為重自江以北皆

吾屏蔽苟欲經理天下則淮南當在所先不可謂殘破之地而遂忽之且州縣民既不多則事亦隨少事少則冗官濫食亦安所用若不痛行減省將見積日累月害民益甚臣愚欲乞每郡自太守而下除酒稅主兵及簽廳官各存留一員刑獄倉庫止一員兼治其餘並罷每縣自知縣而下存留酒稅官一員丞簿尉職事亦止一員兼治其餘並罷去所有管下巡檢及外鎮稅官除係衝要去處依舊存留外餘悉罷之如此則減員雖多必


不至之事俟將來歸業者衆州縣事體寔盛却相度逐旋增添所貴治有條理民得休息伏望睿慈特降詔旨施行取進止

論儲蓄劄子

臣聞國家無九年之蓄曰不足無六年之蓄曰急無三年之蓄曰國非其國也是以立國之道穀食為本量入制用以備凶災方無事時尚當如此而况艱危之際軍師仰給有倍於平日者乎國家數年以來養兵益衆月

費廩餉無慮數十萬斛所幸頻歲登稔不至缺乏然而朝斂暮散僅了目前未聞有所蓄積古人嘗謂六歲旱蓋言豐凶相代不可以為常也萬一豐歲以後繼之年穀不熟民無以輸則將何以為計臣竊見春來霖雨不節二麥既傷而秋成又未可知要當預為之圖訪聞民間猶有積穀可以接新二麥雖傷將來薄收穀價亦必少減臣愚望聖慈委諸路漕臣及茲民有餘粟之時早行措置或從官司兌那糴買或行民戶預行存留各條具

委令如何可廣儲蓄限一月上之戶部相度申尚書省
取旨施行取進止



華陽集卷十四

欽定四庫全書

集部

華陽集卷十五
九

詳校官庶吉士_臣瑚圖禮

主事_臣呂雲棟覆勘

總校官編修_臣王燕緒

校對官主事_臣陳文樞

謄錄監生_臣宋學濂

欽定四庫全書

華陽集卷十五

宋 張綱 撰

劄子

乞舉將帥劄子

給事中
時所論

臣聞三辰不軌擢士為相蠻夷不恭拔卒為將仰惟陛下勵精求治士之懷材抱藝者莫不以次進用獨將帥之臣推擇未廣方今敵勢尚張邊陲未能徹警朝廷所恃以却敵禦侮者不過大將數人而已各據要害按甲

休兵則未見缺事萬一烽火四起必將分道出師前擊
後援若非備豫何以應卒故臣謂爪牙之選在今日尤
當拔奇取穎以防緩急夫前世經武之事每不乏人者
不必皆取良家子苟其材智勇略足以蓋衆雖在微賤
擢實三軍之上不以為嫌所以販繒屠狗盜賊奴隸罪
亡之餘率為一時名將國家自艱難以來兵氣未振然
不可遂以乏材厚誣天下竊意韜畧之士固有沈埋困
躓姓名不得上聞者正須上之人篤意求之耳臣愚欲

望聖慈特詔中外文武臣寮廣行搜訪有能練達戎律
熟知虜情忠勇可備將帥不問有官無官或隱於山林
或見在行伍即具姓名奏聞然後召問審考不次擢用
庶幾如古拔卒為將之意取進止

乞修戰船劄子

給事時
所論

臣竊觀自古興師却敵阻江河以為險則水戰之具不
可不備岑彭以樓船露橈斬任滿於荆門周瑜以艨艟
鬪艦走曹操於赤壁此已往之明驗也邇來朝廷講究

防秋之策不為不熟唯水軍一事未有措置臣固未論
其他且以臨安言之車駕駐蹕於此邊江接海舟楫之
利最為緊急舊有戰船不少樓櫓器械亦略具備今既
歲久往往破壞置之枯河悉不可用逐船篙工戰卒又
復取其健者分隸諸將目今但存空名萬一倉卒有警
乃始簡料久廢之卒而修葺既敝之舟其為計晚矣傳
曰不備不虞不可以師近日邊陲探報尚未寧息所以
備禦之方政當每事儆戒况敵情難測左實右偽聲東

擊西其出入雖遠在江湖千里之外安知乘虛擣隙之計不出於吾指顧之間是則海道迅速尤須過于隄防臣愚欲望聖慈特詔有司將行在戰船棹卒速行修治令統制官糾集訓練以備不測所有其餘沿江舊有水軍去處亦乞劄下所屬施行取進止

論三衙兵少劄子

臣竊觀漢周勃以北軍安劉氏唐李晟領神策收復京師此皆天子禁兵入衛王宮出扈乘輿所以張皇武威

過絕姦宄一旦緩急取之左右足以勘難國家自祖宗
建立基本尤以三衙為重方其盛時所總貔貅之士無
慮數十萬艱難以來闕額不補軍政蕩然名存而實廢
陛下時巡方岳駐蹕之地當使兵衛森列盛于平日而
尺籍伍符迺益加少未聞有所措置方今外有不和之
敵內有竊發之寇而所謂五軍者雖冠神武之名營屯
輦轂要之皆出戰之士至於扈蹕以強天下則正屬三
衙是謂天子爪牙之任昔段秀實有言猛虎所以百獸

畏者以其有爪牙也爪牙廢則狐豚特犬悉能為敵可不深念哉臣愚欲望聖慈特詔大臣取殿司馬及步軍兵籍斟酌多寡講求補卒之法務得驍銳勇果之衆專一訓練以嚴宿衛之列庶幾國勢內重陰有以折奸雄之心天下幸甚取進止

論黨籍之家推恩泛濫劄子

臣聞錄寬恤孤振淹拔滯帝王之盛德往時元祐臣寮子孫流落困躓陛下憐其名族不遇曲加恩惠德至渥

也然臣考之黨籍見於石刻者三百餘人前後推恩已多而來者不止遞相援例無有限極或白皂不試輒命以官或先次注授不問資格一門之中既及其子孫又復旁連弟姪由是上則多泛濫之寵下則啟僥倖之門原其始也本欲加惠忠良之後及其行之稍過則不能無弊臣以謂黨籍之家固宜有以優恤之但不可不為限制方今吏員猥多銓曹無闕可擬若更以此占奪名次則孤寒平進之人愈見留滯臣愚欲乞詔有司將元

祐黨人擇其顯有名德者方許子孫陳乞恩例一次今日以前已經推恩者不得再有陳乞其間人才卓然可用自當別聽推擇區區管見冒瀆聖聽如有可采伏望特賜睿旨施行取進止

論公道劄子

臣聞人材治世之具賞罰勵世之柄是二者其權制於人主而所以行之則責在大臣用人材而行賞罰其要不在乎它曰公而已矣惟公則能生明一措私意於其

間必將昧於所見顛倒錯繆未見其能治也蓋用人材而不公則宜退者進可用者斥是出於私好惡也何以示甄別行賞罰而不公則為善者不見錄稔惡者或幸免是出於私喜怒也何以示勸懲書曰以公滅私民其允懷若乃以私滅公則積日寢久毒流于下民將胥怨何懷之有臣竊觀陛下總攬乾綱慨然獨斷則前日不公之弊無患於不革然臣尚慮左右玩習之久未能盡絕私意精白以承休德欲望聖慈特詔一二大臣專

以至公之道經綸天下人之賢者雖讎必舉其不肖者雖親必黜高爵厚祿旌有功則勿吝嚴刑峻罰加有罪則勿恤如是而日慎一日無或致忽于其間則朝廷之舉動皆合於公論庶幾無負陛下委任責成之意取進止

論守令害民劄子

臣聞張官置吏凡以為民也陛下勵精圖治勤求民瘼詔書為民而下者十常八九非不丁寧懇切而州縣官吏

奉行不虔尚多背公營私剥下媚上恣為貪虐略無忌憚致使斯民日受其弊無所赴愬為縣令者害及一縣而太守不敢誰何為太守者害及一郡而監司未嘗按發蓋自比年以來上下相蔽習成此風恬不知怪臣愚欲望聖慈特降詔旨遣清彊官循行天下以察訪吏治夫遣使之意止欲慰安黎元不必張大聲勢以致騷擾所過郡縣問民疾苦受其詞訴饋遺燕犒一切杜絕庶革請託之弊以專發擿之公其監司及州縣官吏不能

宣上德意而為民害者具姓名申奏悉行罷黜蓋方今天下之事上闕聖慮者非一然以臣觀之安民情固邦本莫先於此倘遂施行天下幸甚取進止

乞除民事一條劄子

臣聞立法所以防姦法既具矣又增益之則條目苛碎而猾吏得以舞文奸必愈甚臣竊見祖宗以來愛養生民唯恐貪殘之吏有以傷之故立公私贓罪三等之法俾吏部量其所犯而限其注擬行之既久輕重咸得其

當頃因臣寮建議遂增置民事之科應緣民事被罪者
並不得注知州軍通判知縣差遣太守令通判親民之官
苟有所犯未有不干涉於民者使其人實由奸貪而犯
賊私之罪則坐以重法固不足卹萬一素行廉勤偶陷
公過而或傳致於民事遂令終身不入親民之選則人
材必有廢棄者豈不重可惜哉又况刀筆之吏因此執
疑似之迹故生沮難或致交通賄賂為害不細臣嘗取吏
部民事條令觀之始於紹興六年而相繼申明重改議

論紛紛至今猶未止也蓋天下皆知其不便唯一時權臣欲專予奪之柄故不肯遽罷但令申取朝廷指揮殊不以紊亂祖宗法度為意臣愚欲望陛下特降睿旨將吏部民事一條早賜蠲除所有百官注擬及公私贓罪格法並依舊制施行庶幾法令簡明易於遵守取進止

乙重監司劄子

臣竊謂今之監司乃古部刺史朝廷付之一路所以督察守令其權不為不重夫守令之治其大略有七一曰

宣詔令二曰厚風俗三曰勸農桑四曰平獄訟五曰興
學校六曰理財賦七曰實戶口使守令得人而七者皆
舉天下無餘事矣苟不得人則按發之職實在監司故
夫論治道者謂得百守令不如得一監司比年以來所
在守令姦貪不法未嘗見監司有一按發者此無他蓋
由用非其人或以資淺望輕而不敢誰何或以識暗才
劣而不能廉察至於觀望權勢則方且奉承之不暇交
通賄賂為之委曲以相容夫為一路刺舉之官而失職

如是則守令之無狀固不足怪守令既無狀而欲七者之治皆舉亦已難矣臣愚伏望聖慈特降睿旨今後監司有關須擇七品以上清望官或曾經朝廷擢用或任郡守治狀顯著者為之所貴位望兼重而可以付之權才能已試而足以舉其職守令皆知奉法不負陛下宵旰圖治之意取進止

乞審聽察劄子

臣伏覩詔旨以星文示變上軫聖慮許士庶實封陳言

又令諸路監司郡守條具便民寬恤事件聞奏仰見陛下嚴恭寅畏克謹天戒亟欲消變復臻和平天下幸甚然臣竊謂求言雖易聽察為難詔旨流行四海之內皆將竭忠盡誠爭獻所聞事有利害固無患壅塞而不上達也既又分命有司看詳其說則是非混淆亦不必慮而臣區區所見尚恐疎遠之人銳於納忠設意過當有強出新意而至重改祖宗舊法者有取便一時而行之既久不能無害者有貪蠲復之名而不以用度較之致

州縣不免暗取於民者若此之類自非深思熟慮難以
遽見臣愚欲望聖慈明詔有司凡看詳羣臣所上章奏
必須審慎究極事情不得一切苟簡更乞萬幾之暇躬
垂省覽唯不悖戾祖宗舊法可以經久而實惠及物乃
聽施行庶幾事體稍重動合人心而和氣可召災異非
所憂也取進止

辭免除叅知政事劄子

臣今月二十五日伏蒙聖恩除臣叅知政事特降中使

宣押赴都堂治事者臣聞命震驚罔知所措伏念臣資
本庸陋齒迫衰殘頃已辭榮絕無進望陛下俯憐舊物
召寘銓曹雖竭疲駑漫淹歲月方懼曠瘵之責敢希超
躡之除况此邇臣與聞大政允謂機衡之要地必資英
博之奇材非臣空疎所宜叨據伏望聖慈推仁從欲為
官擇人收還誤恩以允公議臣無任懇祈激切俟命之
至取進止

辭免再賜新衣金帶鞍馬劄子

臣蒙恩除叅知政事今月六日正謝又蒙聖慈賜臣新
衣金帶鞍馬魚袋竊緣臣被命之初已經宣賜今茲豈
敢再冒龍光伏望陛下察臣庸虛之資方辱高位念臣
盈滿之戒難當異恩特降指揮追還所賜臣無任惶懼
俟命之至取進止

華陽集卷十五

欽定四庫全書

華陽集卷十六

宋張綱撰

劄子 奏狀

乞罷政第一劄子

臣輒瀝危誠上干天聽伏念臣賦材不敏學古無聞遭
值休明擢從遠外方上聖一新於邦治以非才參贊於
廟謨荷生成之恩為至深蒙寵遇之禮為甚厚顧雖捐
軀於萬死且難圖報於毫分詎敢懷安上享隆眷然臣

分窮命薄福過災生氣積脾寒新秋頓作目昏脚弱舊疾轉加豈惟竊位以妨賢亦恐養疴而廢職倘不知止必自速辜伏望皇帝陛下矜念么微保全終始特垂恩造許臣解罷見任職事專一在外宮觀差遣庶便醫藥稍安餘年臣無任祈天懇聖激切俟命之至

乞罷政第二劄子

臣昨日獲對天顏面陳情懇乞解見任職事仰蒙聖慈矜憐衰病存問再三臣退歸私第伏省恩言舉室感戴

至於涕灑今日又蒙特降中使宣押臣造朝及赴都堂
治事眷遇優渥臣何以克當伏念臣寒陋書生本無片
善叨榮逾分殃咎自貽秋深以來衆疾交作自量疲蹇
難以久當重任伏望皇帝陛下曲垂憫恤檢會臣昨日
所進劄子早降處分令臣一在外宮觀差遣臣無任激
切祈天俟命之至取進止

乞罷政第三劄子

臣昨緣疾病陳乞解罷見任職事專臣一在外宮觀差

遣兩蒙聖慈特降中使宣押未賜俞允臣感激惶懼不
知所措臣聞朝廷之上一日二日萬幾責在二三執政
之臣必能殫志極慮夙夜匪懈然後不負寄委之重臣素
乏時才頃已辭祿遭遇陛下非常之知驟加錄用使預
執政之列戴荷聖恩至深至厚非不欲黽勉自竭趨就涓埃
少圖報稱實以衰殘多病心力俱疲苟或不知自量豈
唯臣一身負顛躓之憂而朝廷萬幾亦未免有曠職之
患伏望皇帝陛下曲推大度早賜矜從庶幾使餘生

無愧公議臣無任祈天懇聖激切俟命之至取進止

乞罷政第四劄子

臣比嘗三具劄子乞解任今月九日伏准詔書不允臣仰見聖慈憐念未忍棄捐顧臣何人膺此禮遇區區危衷但極慚感伏念臣本無材術叨貳政機思報國恩唯知自竭然三百六旬之久勞能蔑著於涓埃而七十五歲之身疾病已凋於齒髮是用投誠君父冀遂退休敢期惠渥之臨尚闕俞音之錫臣以零丁弱質衰謝餘年

自知一去於軒墀難復再瞻於天日豈不貪戀明聖顧
懷顯榮第憂瘵曠以招尤不容勉強而尸祿伏望皇帝
陛下乾坤亭育日月照臨早降指揮曲從所請倘或因
此苟延旦暮盡出陛下生成之福臣無任祈天懇聖激
切俟命之至取進止

辭免資政殿學士知婺州劄子

臣近者屢貢封章懇辭政事退量瀆犯方俟譴呵今月
十一日伏准尚書省劄子奉聖旨除臣資政殿學士知

婺州臣聞命震驚罔知所措臣竊謂士之從仕固欲善其始終君之待臣每務全於體貌至若便私而有請乃令因請以叨恩則上多虛授之嫌而下有難安之勢臣自膺重任亦既彌年初無雜草之功積有負薪之疾慮曠瘵而速戾上玷清朝及彈擊之未加仰陳危懼倘使奉祠而得請尚憂公議之不容矧茲秘殿隆名金華古郡是所謂勲舊均勞之禮其可付衰殘養疾之人雖聖慈或出於愛忘而私義終難於冒處伏望皇帝陛下矜

臣愚拙唯合退閒特降指揮收還成命止乞令臣守本
官專一在外宮觀差遣庶安薄分用穆師言無任祈天
懇聖激切俟命之至取進止

投進恩賜御書墨本劄子

臣昨准告除資政殿學士知婺州陛辭之日伏蒙聖慈
特降中使齋御書一封賜臣通犀帶一條臣以異恩出
於望外捧受之次兢惶不知所措仰見陛下俯憐衰病驟
去關庭特示殊私俾安孤跡臣雖萬死豈足以上報委

曲生全之恩感戴至深言窮涕泣臣叨蒙光寵欲以傳
示不朽輒將所賜御書摹勒上石謹以墨本裝成卷軸
昧死投進庶幾少効臣子感恩歸美之萬一干冒天威
臣無任墮越待罪之至取進止

乞修心治國劄子

臣庸陋不才頃蒙太上皇帝自小官拔擢至參大政曾
無毫髮功效上報厚恩迫以衰病謝事去國昨者陛下
受命握符光臨大寶臣屏伏田野逖聞堯舜盛德之事

無緣踏舞玉階自同百獸今遇大駕時巡過臣鄉郡臣
可謂千載一時之幸輒有區區愚衷敢因賜對冒昧奏
聞臣伏見神宗皇帝即位之初司馬光任御史中丞論
天下事未及其他而先之以人君修心治國之要其言
曰修心之要有三一曰仁二曰明三曰武修政治興教
化育萬物養百姓此人君之仁也知道義識安危別賢
愚辨是非此人君之明也惟道所在斷之不疑姦不能
惑佞不能移此人君之武也治國之要亦有三一曰官

人二曰信賞三曰必罰人主誠能收采天下之英俊隨其所長而用之有功者勸之以重賞有罪者威之以嚴刑譬如乘輕車駕駿馬總其六轡奮其鞭策何往而不至哉臣誦光遺文每至此未嘗不歛衽太息以謂古先哲王之所以治天下與夫謀臣議士之所以盡忠於其君考諸五經百氏歷代載籍之傳求其至精至要誠無出於此六者方今內憂弊政外患強敵錢穀甲兵獄訟盜賊之事雜然上闕聖慮寔宵衣旰食之時臣願陛下俯念

光言日加三省事有合於此六者必力行之害於此六者必亟去之一頓一笑之間取則於是而無或暫忘若是則心之所主既簡而定萬幾雖勞應之不繁矣臣退閒既久時事不敢與聞獨獻平生服膺之言庶少補聰明之萬一惟陛下勿謂迂闊而棄之天下幸甚取進止

辭免起居舍人狀

紹興三年正月先兼中書門下省檢正諸房公事二月除

起居舍人

右臣今月

闕

日准尚書省劄子奉聖旨除臣起居舍人

日下供職者竊以史臣之職君舉必書宜付偉才以昭
盛德而臣學不通古智昧趨時誤辱眷知召從疎遠使
備員於宰屬顧何補於公家方懼尸榮更叨茂渥况當
宁圖功之日衆賢聚於本朝而直筆記事之官一時謂
之清選自視薄陋豈應冒居仰觀睿慈俯矜愚悃收還
成命免致煩言所有恩命臣未敢祇受謹錄奏聞伏候
敕音

辭免中書舍人狀

紹興三年五月自起
居舍人遷中書舍人

右臣今月十五日准尚書省劄子奉聖旨除臣中書舍
人日下供職者竊以中書為政事之源內史掌詞命之
職惟時妙選宜屬偉才伏念臣行能不過於常人名實
未孚於衆聽豈謂衰遲之迹誤蒙聖哲之知頃自外臺
召宣宰屬未及暖席進列史官綴法從之清班望睟容
於丹陛恩光厚矣自量已過於所期功效蔑如詎敢更
叨於非據况乃代言之地尤以稱職為難比偶闕員猥
嘗承乏書詔填委既無潤色之能巧匠傍觀徒有汗顏

之愧惟已試之如此亦自知之甚明倘遂即真而不辭
將恐煩言之隨至仰祈睿鑒俯察微誠特反渙恩庶安
愚分所有恩命臣未敢祇受謹錄奏聞伏候敕音

除中書舍人舉魏良臣自代狀

蒙恩授前件職准令節文侍從官授訖三日內舉
官一員自代者

右臣伏覩左從政郎充詳定一司勅令所冊定官魏良
臣奮自學校聞於縉紳持已端方勵古人之節屬文典

麗有作者之風舉以代臣實允公議謹錄奏聞伏候敕

旨

乞宮觀第一狀

在中書舍人因母病連章乞祠養親章四上乃得旨送母還鄉

紹興三年八月十二日到家復上章乞終養不允

右臣頃從疎賤躡處從班未有分毫少伸報効今以事
出迫切不避譴責輒輸悃誠仰瀆宸聽伏念臣父母年
老昨者迎侍偕來庶奉甘旨而臣父以不服水土先還
里中獨留母氏于此涉夏至今卧病相仍緣臣兄弟終

鮮別無兼侍每趨朝入局藥餌俱廢今則病勢寔劇未有痊損之期兼臣父在鄉孑然一身久闕供養人子之心實不遑處欲望聖慈矜憐特令臣以本官任在外宮觀一次庶當孝治之朝不廢篤親之義臣無任祈天懇聖激切之至謹錄奏聞伏候救旨

乞宮觀第二狀

右臣近為母氏久病輒具奏陳乞以本官任在外宮觀一次伏蒙聖恩未賜俞允臣微誠迫切不能自己再干

天聽罪不容誅伏念臣母年垂八十昨緣迎侍至忽得
脾疾醫療踰月至今未瘥臣叨塵侍從供職未久初不
敢便有陳請緣數日來疾勢增加而臣職事之外餘力
無幾既兄弟終鮮又無得力子姪可以供承藥餌責在
臣身實虧孝養而臣父前歸鄉里不願遠來甘旨之奉
亦復久闕此臣所以日夜憂惶莫知所處仰恃陛下天
地養育之恩一物失所尚軫聖慮故輒再申前懇冀獲
矜憐倘蒙從欲之仁即臣異日糜骨捐軀圖報未晚欲

望睿慈特賜檢會臣前奏令臣以本官任在外宮觀一次
臣無任祈天懇聖激切俟命之至謹錄奏聞伏候敕旨

乞宮觀第三狀

右臣以母病再瀝誠懇上干天聽乞以本官任在外宮
觀疊蒙聖恩未賜俞允顧臣愚分豈當更有叙陳實以
情迫于中不能自己臣聞臣子之事君親恩義相須未
有關於事親而能事其君者臣愚不肖仰荷陛下拔擢
豈不知竭犬馬之力圖報萬分實緣母病日久父先還

鄉所以供子職者惟臣一身恩愛所牽不遑寧處今來
母氏所苦醫療百端未見減損衰晚之年氣血浸耗竊
欲迎侍蚤歸鄉里若蒙天慈俯遂前請則臣一門賴陛
下優容生養之恩過于天地異時碎首捐軀誓圖報塞
臣以供承藥餌見今在告深恐因循妨廢職事伏望聖
慈察臣懇迫之情特賜檢會前奏令臣以本官任在外
宮觀一次干冒天威臣無任戰懼俯伏俟命之至謹錄
奏聞伏候敕旨

乞宮觀第四狀

右臣昨為母氏不安奏乞在外宮觀差遣以便醫藥准尚書省劄子奉聖旨不允續蒙給臣寬假仍許將母還鄉臣一介賤微上荷聖慈察其懇切曲加矜念仰惟天地父母涵容拊育之恩非臣殞首捐軀所能報稱臣本貫鎮江府金壇縣已於八月十二日迎侍到家自初得告今已逾月望闕懷戀夙夜靡寧便當還朝亟就班次緣臣母病寢久未獲痊平氣血虛羸近尤增劇臣別無

兄弟侍疾嘗藥唯臣一身遽舍而去於義難處若更在假淹留又恐益廢職事私情雖迫公議肯容臣幸以謏薄之資躡升華近之列惟思答効豈敢懷安特由恩愛所牽奔趨莫遂俯仰自念憂灼彌深是用輒冒天威具陳前懇伏望陛下俯垂睿聽特賜檢會臣七月二十五日以後累奏令臣以本官任在外宮觀一次庶幾救水致養免於遺親犬馬報恩期以異日臣無任祈天懇聖激切惶懼之至謹錄奏聞伏候敕旨

--	--	--	--	--	--	--	--

1895

11

華陽集卷十六

欽定四庫全書

華陽集卷十七

宋 張綱 撰

奏狀

駁陳鑄吳說差遣指揮狀

右臣今月十四日准中書門下省送到錄黃一道右朝
奉大夫吳說差權發遣江南西路轉運判官右承議郎
陳鑄差提舉兩浙西路茶鹽公事臣伏見吳說陳鑄輕
儇不端皆無素行內吳說昨任兩浙市舶緣苗傅叛逆

附會兇黨忽除金部郎官仍領市舶職事後因臺臣論
列罪狀顯明與劉蒙范仲熊等同被黜責未幾復除福
建運判物論大喧偶緣丁憂遂免彈擊兼其為人貪冒
無恥嘗以習書大字所在求請牌額為人題寫以徼厚
利有識鄙之鑄昨任江東鹽司過惡暴著言者亦嘗論
其貪污黃緣冒進等事而罷其差遣臣不復縷陳契勘
監司刺舉一路委寄非輕如二人者皆罪戾之餘久犯
清議方當循名責實之公朝豈容更叨重寄臣若不言

必致公論沸騰復煩朝廷改命欲望聖慈當成命未行之時特賜寢罷所有上件錄黃臣未敢書行繳連在前謹錄奏聞伏候敕旨

駁陳伯彊恩澤指揮

右臣今月二十五日准中書門下省送到錄黃一件為陳獻用父伯彊致仕恩澤特補將仕郎臣檢會紹興薦舉令節文諸中大夫以下見責降亡致仕不得亡蔭補恩澤臣勘詳陳獻父伯彊昨任正言得罪送吏部與合

入差遣未經牽復間守本官致仕正是責降中致仕之人於條不合陳乞蔭補據陳獻狀詞自稱伯彊因言高俅妄造聖語得罪其事有無虛實歲月深遠難以攷究正使當日所言罪狀有實則責降之後亦須先經朝廷洗雪始可追復給還致仕恩澤况伯彊之死已近三十年前此未嘗叙雪陳乞今迺遽有此命不知何所據憑其人引用沈疇近例又不知疇之所乞於見行格法有無過碍夫法者所與天下公共者也今來陳伯彊身雖

已死罪籍未除若遽推恩與子即今日以前死於謫籍者更引伯彊近例將何以止之臣愚欲望聖慈特降睿旨將所與陳獻一資恩澤遵依紹興條令特賜寢罷以絕僥倖之路所有錄黃臣未敢書行繳連在前謹錄奏聞伏候敕旨

繳薛昂復官恩澤詞頭

正月二十六日准中書省吏房送到詞頭一道責授左中奉大夫薛昂上表遺事奉聖旨薛昂特追

復特進其遺表恩澤依條施行令臣命詞行下者
右臣契勘自來臣寮死于謫籍察其平時無甚顯惡則
追復還官職間亦有之蓋是朝廷一時特恩不可以為
常也臣竊見薛昂以腐儒之學黨附蔡京致位近弼當
政和宣和間朝廷大事一無建明專務諂諛同惡相濟
稔成今日艱危之禍天下疾之甚于仇讐罪惡顯著臣
不復具陳陛下寬恩不賜竄殛俾得終於牖下已為厚
幸今若因其所上遺表追復舊官即是誤國之臣歿有

榮耀非特忠邪不辨無以昭示天下兼恐應責降中身
亡之人有如昂者復引此為例無辭以却臣愚欲望聖
慈將薛昂追復特進恩命特賜寢罷所有上件詞頭臣
未敢撰述謹錄奏聞伏候勅旨

駁張公裕解字指揮狀

今月二十九日中書門下省工房送到敕黃一道
為奉聖旨指揮梁汝嘉將舊祇候庫屋十間添修
充張公裕解字其雜買務別行踏逐令臣書行者

右臣竊見自來官司解宇皆以所管職事為名其下便為治所未有無職事而得居解宇者今來張公裕係同管客省四方館閣門公事兼總領海船契勘客省閣門等職事見在禁中從舊不會別置解宇兼客省閣門官非止公裕一名公裕應得他人皆可得也若以總領海船為名則其職事係在明州於行朝別無所治豈有置解宇於此而遙領職事於彼者况舊祇候庫已改作戶部雜買務今若添修充張公裕解宇其雜買務別行踏

逐不唯公裕居之無名而改更添修土木工費煩費實
多兼恐僥倖之門一啟他日滋蔓無以杜絕臣愚欲望
聖慈特下有司叅照如張公裕目今職事不當得解字
即乞將上件聖旨指揮速行寢罷所有敕黃臣未敢書
行謹錄奏聞伏候勅旨

駁錢稔與郡指揮狀

今月初七日晚准中書門下省送到敕黃一道奉
聖旨錢稔與郡令臣書行者

右臣竊觀比年以來所以害民者莫甚乎貪殘之吏迺者陛下數頒明詔訓敕中外又臨遣五御史巡行郡國以察治狀其有贓污不法與夫刑獄寬濫皆得以上聞仰見聖心慨然欲革其弊甚盛德也臣方竊喜以謂貪殘之吏自是當知所畏矣今日忽見錢稔得旨與郡眾口譁譁殊不曉所以然者契勘錢稔素無廉聲而有酷惡之資頃為臣寮論列其奉使浙西則罪贓狼籍皆得所取受迹狀甚明其任大理少卿則持刑不平專事觀

望嘗以三等風指授其同列臣雖不識稔以言章攷之而叅以士論蓋行汙寄治倚權勢為暴者也貪殘二字稔實盡之若使之為郡其能以廉節自持為陛下牧養小民乎其能體欽恤之意而不擾於獄市乎向自廷尉以彈章罷職未幾除知台州又復言罷衆謂稔當廢放終身今日豈可更臨郡寄臣愚欲望聖慈察前後章疏所言罪狀將今來與郡指揮特賜寢罷所有錄黃臣未敢書行謹錄奏聞伏候敕旨

乙宮觀第一狀

右臣輒傾微悃上干睿聽情有所迫罪不容誅伏念臣猥以凡庸繆塵禁近竊祿逾分天降疾災舊苦風痰常多昏眩迺自此月十一日以來驟爾復作頭目旋暈顛仆弗支心悸氣滿移時方定迨今旬日發動至再臣職在詞掖實掌贊書方當無病之時猶負素餐之愧矧茲遽嬰疾疢豈不深懼曠瘵臣父母垂暮久還鄉里旁無兼侍供養有關人子之分實不自安伏望陛下察臣病

衰難於任事憐臣親老許以便私特垂天地覆育之恩
令臣以本官任在外宮觀差遣一次庶獲少休餘息不
廢孝養他日圖報誓當糜捐臣無任祈天懇聖激切俟
命之至謹錄奏聞伏候敕旨

乞宮觀第二狀

右臣近以風眩不安嘗傾微悃乞以本官任在外宮觀
差遣伏蒙聖慈未賜俞允忱情迫切欲已不能伏念臣
謬忝禁嚴粗知分義既謂居官而任責豈敢無故而求

閒誠以叨昧逾涯災疾橫作驚悸旋暈衆所共知行立
稍勞即便發動每當趨就朝列常虞顛仆失容至若入
直省中亦恐眩昏曠職今在告醫治已是數日未獲痊
平顧茲詞掖機要之司非是愚臣養痾之地此臣所以
憂惶踖踖莫知攸處所有臣父母闕養固已嘗具奏陳
更不敢喋喋干冒天聽今者止為臣身自嬰疾難於任
事理須控告遂至黷煩伏望聖慈俯垂矜閔特賜睿旨
檢會臣前奏令臣以本官任在外宮觀差遣一次輕犯

天威臣無任惶懼待罪之至謹錄奏聞伏候敕旨

駁汪若海差遣指揮狀

右臣今月十三日准中書門下省送到敕黃一道為右
宣義郎趙不凡差通判泉州右宣義郎鄧襄通判沅州
右承奉郎汪若海通判無為軍令臣書行臣伏見數內
汪若海浮躁輕脫素無士檢昨任三省樞密院幹辦官
與同僚何大圭日事捕酒肆為荒嫚爭淫娼婦至相毆
擊嘗為臺臣論列除名勒停編置嶺外偃蹇不赴欲圖

苟免後蒙寬恩釋放稍還官秩而故態勿悛逋蕩無復
羞畏措紳之所不齒方今州郡之治責在守倅無為雖
號小壘屢經殘破正賴撫綏得人乃以半刺之權付此
狂士竊恐陵上虐下有害郡政不能仰副陛下寬恤元
元之意兼若海見係守令資序罪廢之後升為通判士
論疑之臣愚欲望聖慈將汪若海通判無為軍指揮特
賜寢罷所有敕黃臣未敢書行謹錄奏聞伏候敕旨

駁祁彥質請改指揮狀

今月初七日准中書門下省送到敕黃為知潭州
祁彥質奏乞詳酌紹興三年十月二十五日指揮
為土豪及細民乘時作過等事今謹開具下項

一檢會紹興三年十月二十五日指揮節文自
紹興二年正月一日以前諸路州縣曾經金人
占據及羣寇殘破去處土豪專輒斬殺并鄉村
細民乘時作過限今降指揮到日將已受詞訴
限十日結絕不得支蔓日後更有詞訴並不得

受理

一今來祁彥質申請乞更詳酌紹興三年十月二十五日指揮將委會殺人放火如被害之家自陳若鄰保及徒中告首而事狀彰聞證佐明白者內為首之人許依法勘斷自餘支黨特免窮治即事不干已并教唆詞訟或官吏不為審實輒行追逮捕繫者並坐以法四月七日奉聖旨今後如有論訴或告首罪惡顯著事迹明白

官司見得確實方許勾追證佐將為首人依法
勘斷自餘支黨特免窮治不得稍涉支蔓餘依
所乞

右臣看詳紹興三年十月二十五日指揮蓋緣兵火之
際小人乘時作過至今經隔五六年而詞訴不絕獄訟
滋多所以特降聖旨截自紹興二年正月一日以前所
犯已在官者限日結絕未在官者指揮到後並不許受
理今祁彥質所奏乞詳酌上件指揮將委曾殺人放火

如被害之家自陳若鄰保及徒中告首將為首之人許
依法勘斷即是前來指揮全不可遵用再詳四月七日
聖旨今後如有論訴或告首罪惡顯著事迹明白官司
見得確實方許勾追證佐將為首人依法勘斷臣竊謂
朝廷立法蓋本人情自建炎兵火以來無知之人所在
作過何所不有州縣根治誅鋤首惡略盡其有不經官
司論訴者必是事迹不甚顯著兼其情理亦必不至切
害如此等罪雖未曾論理宜矜恕聽其自新今所犯在

數年之前事既滅息乃始降指揮許令告首即與當時立法之意正相背戾指揮纔下將見平日挾怨規利之徒自此轉相告訐無有已時事既在官若不勾追證佐何由見得確實雖云不得稍涉支蔓方首從未分之時追逮所及支蔓必多若以謂被苦之家及鄰保等必欲訴寃則兵火纔息自合告陳何自今日乃始生事自降不許受理指揮至今將及半年若又重改不行豈唯滋長姦弊亦恐無以示信四方以臣所見紹興三年十月

二十五日指揮委是允當却合依舊遵守所有今來錄黃臣未敢書行伏望聖慈更賜詳酌謹錄奏聞伏候敕旨
又貼黃稱

契勘紹興三年十月二十五日指揮係臣面對奏請施行事今祁彥質所乞乃是重改已降指揮與臣當時奏請之意不同故臣不得不論乞賜睿察

華陽集卷十七